

**BOSNA I HERCEGOVINA
FEDERACIJA BOSNE I HERCEGOVINE
KANTON SARAJEVO
OPĆINSKI SUD U SARAJEVU
Broj: 65 0 K 1051703 24 K
Sarajevo, 13. 3. 2024. godine**

U IME FEDERACIJE BOSNE I HERCEGOVINE

Općinski sud u Sarajevu, sudija Begtašević Tin, uz sudjelovanje zapisničara Hasković Maide, u krivičnom predmetu protiv optuženog S.N., zbog krivičnog djela bludne radnje iz člana 208. stav 2. u vezi stava 1. Krivičnog zakona Federacije Bosne i Hercegovine (KZ FBiH), nakon ročišta za razmatranje sporazuma o priznanju krivnje i rasprave za izricanje krivičnopravne sankcije, održanog u prisutnosti tužioca Kantonalnog tužilaštva Kantona Sarajevo Škaljić Sanele, optuženog S.N. i njegovog branioca advokata Beglerović Damira, u skladu sa odredbama člana 246. Zakona o krivičnom postupku Federacije Bosne i Hercegovine (ZKP FBiH), dana 13.3.2024. godine donio je i javno objavio sljedeću

PRESUDU

Optuženi: **S.N.**, sin A. i E., rođene R., rođ. godine u S., nastanjen na adresi Ul. broj ..., općina S.G., S., državljanin BiH, JMB ..., SSS, po zanimanju saobraćajni tehničar, u penziji, udovac, otac jednog djeteta, po izjavi srednjeg imovnog stanja, osuđivan presudom Apelacionog suda u, ne vodi se drugi krivični postupak,

KRIV JE

Što je: Dana 17.9.2023. godine u vremenskom periodu između 19:00 i 19:10 sati dok se prevozio kao putnik u kombi motornom vozilu javnog gradskog saobraćaja pravnog lica „Centrotrans“, registarskih oznaka ... koji je saobraćao na relaciji, prišao maloljetnoj XY (rođena godine) tada djetetu od oko 14 (četnaest) godina, koja je sjedila na sjedištu za dvoje, sjeo pored iste, iako je bio svjestan da se radi o maloljetnoj osobi, s ciljem zadovoljavanja svog seksualnog nagona, što je i htio, te joj se obratio riječima: „*Ti ćeš sa mnom na .., to je završena priča, nema raspravljanja*“ i „*Šta ti misliš što ja nemam sreće sa ženama*“, a zatim joj svoju ruku spustio na desno koljeno, odnosno butinu maloljetne XY, da bi je potom rukom dodirivao i milovao u predjelu butine, praveći kružne pokrete palcem svoje ruke po opisanom dijelu tijela pomjerajući ruku na više prema kuku i intimnim dijelovima maloljetne XY, a što je sve kod iste dovelo do akutnog PTSP simptoma koji uključuju intruzivne, nametljive misli i sjećanje na bolne događaje, noćne more, strahove, kognitivno izbjegavanje negativnih misli i sjećanja,

Čime je, počinio krivično djelo bludne radnje iz člana 208. stav 2. u vezi stava 1. KZ FBiH.

Pa mu sud, primjenom navedenih zakonskih odredbi, kao i odredbi člana 41. tačka a) i člana 43. KZ FBiH, izriče

KAZNU ZATVORA U TRAJANJU OD 1 (JEDNE) GODINE

Na osnovu člana 57. stav 1. KZ FBiH, optuženom S.N. se u izrečenu kaznu zatvora uračunava vrijeme koje je proveo u pritvoru, i to od **20.9.2023.** godine, pa do upućivanja na izdržavanje kazne zatvora.

Na osnovu člana 212. stav 2. ZKP FBiH zakonska zastupnica oštećene XY, L.Š., se sa imovinskopravnim zahtjevom upućuje da može ostvarivati u parničnom postupku.

Na osnovu člana 202. stav 4. ZKP FBiH optuženi S.N. se djelimično oslobađa od obaveze plaćanja troškova krivičnog postupka, i to u odnosu na troškove odbrane, koji padaju na teret budžetskih sredstava, dok se na osnovu člana 202. stav 1. ZKP FBiH obavezuje na plaćanje troškova krivičnog postupka u ukupnom iznosu od **840 KM**, koji iznos je dužan uplatiti u roku od **3 (tri) mjeseca** od pravosnažnosti presude, pod prijetnjom prinudnog izvršenja.

Obrazloženje

1. Optuženje i tok postupka

Kantonalno tužilaštvo Kantona Sarajevo je optužnicom broj T09 0 KTD 0188465 23 od 5.12.2023. godine optužilo S.N. da je, radnjama opisanim u optužnici, počinio krivično djelo bludne radnje iz člana 208. stav 2. u vezi stava 1. KZ FBiH, koja optužnica je potvrđena odlukom sudije za prethodno saslušanje ovog suda dana 11.12.2023. godine.

Na ročištu za izjašnjenje o krivnji održanom dana 15.1.2024. godine optuženi S.N. se pred sudijom za prethodno saslušanje ovog suda izjasnio da nije kriv za krivično djelo koja mu se stavlja na teret, nakon čega je predmet dostavljen postupajućem sudiji radi zakazivanja i održavanja glavnog pretresa.

Dana 14.2.2024. godine, prije održavanja nastavka glavnog pretresa, Općinski sud u Sarajevu je zaprimio sporazum o priznanju krivnje broj T09 0 KTD 0188465 23 od 13.2.2024. godine zaključen između tužioca Kantonalnog tužilaštva Kantona Sarajevo Škaljić Sanele, optuženog S.N. i njegovog branioca advokata Beglerović Damira.

Sporazumom o priznanju krivnje broj T09 0 KTD 0188465 23 od 13.2.2024. godine, po članu 1., *optuženi S.N. priznaje krivicu za krivično djelo bludne radnje iz člana 208. stav 2. u vezi stava 1. KZ FBiH, za koje je optužen optužnicom Kantonalnog tužilaštva broj: T09 0 KTD 0189465 23 od 5.12.2023. godine, a koja je potvrđena od strane Općinskog suda u Sarajevu dana 11.12.2023. godine; po članu 2., kantonalni tužilac, shodno Sporazumu, je saglasan da se optuženom S.N. u skladu sa članom 43. KZ FBiH, za krivično djelo bludne radnje iz člana 208. stav 2. u vezi stava 1. KZ FBiH za koje priznaje krivicu izrekne kazna zatvora u trajanju od 1 (jedne) godine; po članu 3., optuženi S.N. je saglasan da mu se, za krivično djelo bludne radnje iz člana 208. stav 2. u vezi stava 1. KZ FBiH, izrekne kazna zatvora u trajanju od 1 (jedne) godine; po članu 4., optuženi S.N. potpisujući Sporazum, potvrđuje da je izjavu o priznanju krivice dao dobrovoljno i svjesno, nakon što je upoznat sa sadržajem optužnice i na moguću obavezu naknade štete i plaćanja troškova postupka. Stranke su saglasne da odluku o troškovima krivičnog postupka, kao i odluku u vezi imovinskopravnog zahtjeva prepuste sudu; po članu 5., potpisujući ovaj sporazum optuženi S.N. potvrđuje da razumije da se potpisivanjem ovog sporazuma odriče prava na suđenje i da ne može uložiti žalbu na kaznu koju će mu izreći sud.*

Dana 26.2.2024. godine održano je ročište za razmatranje navedenog sporazuma o priznanju krivnje na kojem su stranke i branilac potvrdili da sadržaj sporazuma koji im je pročitao odgovara onome što su dogovorili.

Prilikom razmatranja sporazuma o priznanju krivnje na ročištu održanom dana 26.2.2024. godine, sud je izvršio provjere u skladu sa članom 246. stav 6. ZKP FBiH, te utvrdio da je optuženi, nakon upozorenja sudije o posljedicama prihvatanja sporazuma, isti zaključio dobrovoljno, svjesno i sa razumijevanjem, da je svjestan svih posljedica, uključujući i moguće posljedice vezane naknadu troškova postupka, kao i da se potpisivanjem i prihvatanjem sporazuma o priznanju krivnje odriče prava na suđenje i prava da uloži žalbu na krivičnopravnu sankciju koja će mu se izreći u skladu sa sporazumom. Također, optuženi S.N. je potvrdio da je sporazum o priznanju krivnje zaključio dobrovoljno, da nije bilo nikakvih uticaja na njega, da potpisani sporazum u potpunosti odgovara njegovoj slobodnoj volji, te da prilikom potpisivanja

sporazuma nije bio pod uticajem alkohola, opojnih droga, nesanice ili bilo čega što može dovesti u pitanje njegovu svijest i razumijevanje o posljedicama potpisivanja sporazuma.

Potom je tužilac prezentirala dokaze o krivnji optuženog, kao i dokaze koji potkrepljuju navode optužnice, i to: zapisnik o prijemu usmene prijave MUP-a Kantona Sarajevo, Uprava policije, Policijska uprava Stari Grad, Odjeljenje kriminalističke policije, broj: 02/8-2-04-2-1198/23 od 18.9.2023. godine, potvrda o privremenom oduzimanju predmeta od E.K. MUP-a Kantona Sarajevo, Uprava policije, Sektor kriminalističke policije, Odjeljenje za krvne, seksualne delikte i ratne zločine, broj: 02/3-2-159/23 od 4.10.2023. godine, zapisnik o privremenom oduzimanju predmeta MUP-a Kantona Sarajevo, Uprava policije, Sektor kriminalističke policije, Odjeljenje za krvne, seksualne delikte i ratne zločine, broj: 02/3-2-159/23 od 4.10.2023. godine, potvrda o privremenom oduzimanju predmeta od N.S. MUP-a Kantona Sarajevo, Uprava policije, Sektor kriminalističke policije, Odjeljenje za krvne, seksualne delikte i ratne zločine, broj: 02/3-2-160/23 od 4.10.2023. godine, zapisnik o privremenom oduzimanju predmeta MUP-a Kantona Sarajevo, Uprava policije, Sektor kriminalističke policije, Odjeljenje za krvne, seksualne delikte i ratne zločine, broj: 02/3-2-160/23 od 4.10.2023. godine, potvrda o privremenom oduzimanju predmeta od A.H. MUP-a Kantona Sarajevo, Uprava policije, Sektor kriminalističke policije, Odjeljenje za krvne, seksualne delikte i ratne zločine, broj: 02/3-2-161/23 od 4.10.2023. godine, zapisnik o privremenom oduzimanju predmeta MUP-a Kantona Sarajevo, Uprava policije, Sektor kriminalističke policije, Odjeljenje za krvne, seksualne delikte i ratne zločine, broj: 02/3-2-161/23 od 4.10.2023. godine, naredba Općinskog suda u Sarajevu broj: 65 0 K 1051593 23 Kpp od 10.10.2023. godine, naredba Općinskog suda u Sarajevu broj: 65 0 K 1051593 23 Kpp od 10.10.2023. godine, naredba Općinskog suda u Sarajevu broj: 65 0 K 1051593 23 Kpp od 10.10.2023. godine, naredba Općinskog suda u Sarajevu broj: 65 0 K 1051593 23 Kpp od 12.10.2023. godine, naredba Općinskog suda u Sarajevu broj: 65 0 K 1051593 23 Kpp od 29.9.2023. godine, službeni izvještaj policijskih službenika MUP-a Kantona Sarajevo, Uprava policije, Sektor kriminalističke policije, Odjeljenje za krvne, seksualne delikte i ratne zločine, broj: 02/3-2-479/23 od 4.10.2023. godine, zapisnik o prepoznavanju lica MUP-a Kantona Sarajevo, Uprava policije, Sektor kriminalističke policije, Odjeljenje za krvne, seksualne delikte i ratne zločine, broj: 02/3-2-460/23 od 21.9.2023. godine, foto-dokumentacija MUP-a Kantona Sarajevo, Uprava policije, Sektor kriminalističke policije, Odjeljenje za kriminalističku tehniku i forenziku, broj: O.R. 857/23, datum fotografisanja 21.9.2023. godine, izvještaj o pregledu video zapisa policijskog službenika MUP-a Kantona Sarajevo, Uprava policije, Sektor kriminalističke policije, Odjeljenje za krvne, seksualne delikte i ratne zločine, broj: 02/3-2-554/23 od 13.11.2023. godine, bijela koverta u kojoj se nalaze jedan CD-R, 2x DVD-medij, foto-dokumentacija MUP-a Kantona Sarajevo, Uprava policije, Sektor kriminalističke policije, Odjeljenje za kriminalističku tehniku i forenziku, broj: 02/3-5-03-KI-830/23, datum izrade 15.11.2023. godine, timski psihijatrijsko-psihološki nalaz i mišljenje vještaka Čemalović Omera i Dervović Elvedine od 13.10.2023. godine, sudsko - psihijatrijski nalaz i mišljenje vještaka Ahmić Muhameda od 29.11.2023. godine, akt MUP-a Kantona Sarajevo, Uprava policije, Sektor kriminalističke policije, broj: ... od 21.9.2023. godine, naredba Kantonalnog tužilaštva Kantona Sarajevo broj: T09 0 KTD 0188465 23 od 9.10.2023. godine, naredba Kantonalnog tužilaštva Kantona Sarajevo broj: T09 0 KTD 0188465 23 od 26.10.2023. godine, naredba Kantonalnog tužilaštva Kantona Sarajevo broj: T09 0 KTD 0188465 23 od 27.11.2023. godine, službena zabilješka policijskih službenika MUP-a Kantona Sarajevo, Uprava policije, Policijska uprava Stari Grad, Policijska stanica Stari Grad, broj: ... od 18.7.2023. godine, službena zabilješka psihologa MUP-a Kantona Sarajevo, Uprava policije, Sektor kriminalističke policije, broj: ... od 21.9.2023. godine, zapisnik o saslušanju maloljetnog svjedoka XY, Kantonalnog tužilaštva Kantona Sarajevo broj: ... od 29.9.2023. godine sa prilogom transkript saslušanja i optički medij, zapisnik o saslušanju svjedoka F.Š. Kantonalnog tužilaštva Kantona Sarajevo broj: T09 0 KTD 0188465 23 od 27.11.2023. godine, zapisnik o ispitivanju osumnjičenog S.N. Kantonalnog tužilaštva Kantona Sarajevo broj: T09 0 KTD 0188465 23 od 22.9.2023. godine, rješenje Kantonalnog tužilaštva Kantona Sarajevo broj: T09 0 KTD 0188465 23 od 27.11.2023. godine, rješenje Kantonalnog tužilaštva Kantona Sarajevo broj: T09 0 KTD 0188465 23 od 1.12.2023. godine.

Odbrana nije imala primjedbi na navedene dokaze.

Pozvani da se izjasne o razlozima zaključenja sporazuma o priznanju krivnje, tužilac je izjavila da je Tužilaštvo sa braniocem i optuženim zaključilo sporazum o priznanju krivnje za predmetno krivično djelo i tom prilikom su uzete u obzir sve okolnosti i prednosti skraćenog postupka, da je u pogledu visine utvrđene kazne uzeto u obzir da je optuženi ranije osuđivano lice, ali 1980. godine, sa druge strane uzeta je u obzir posljedica nastala kod oštećenog djeteta, koja je opisana u činjeničnim navodima optužnice, te značajna dobna razlika između optuženog i oštećene, da zaključenje sporazuma doprinosi efikasnosti, u kojem slučaju svjedoci neće morati biti pozivani na sud, a naročito maloljetna oštećena, zbog čega smatra da je utvrđena visina kazne adekvatna, kao i da se u spisu nalazi dovoljno dokaza o krivnji optuženog, te predložila da sud prihvati zaključeni sporazum.

Branilac optuženog je izjavio da se odbrana u ranoj fazi postupka obratila tužilaštvu, iz razloga što smatra da je prijedlog sankcije svrsishodan, s obzirom da će isti imati uticaj na optuženog u pogledu specijalne prevencije, a da je realna i sa aspekta generalne prevencije, ukazao da se odbrana rukovodila činjenicom da se zaključenjem sporazuma štiti maloljetna oštećena, koja se neće izlagati bespotrebnom stresu dolaska na sud i svjedočenja, ukazao da je optuženi iskazao i spremnost da se i imovinskopравни zahtjev oštećene riješi putem nagodbe, sve po predočavanju dokaza o visini, a sve iz razloga da bi se oštećena zaštitila od ponovnih vještačenja, kao i trajanja parničnog postupka, dok se optuženi saglasio sa navodima branioca.

U postupku razmatranja sporazuma o priznanju krivnje, sud je u skladu sa odredbom člana 246. stav 6. tačka b) ZKP FBiH utvrdio da postoji dovoljno dokaza o krivnji optuženog, te da je predložena krivičnopravna sankcija u zakonom predviđenim okvirima, zbog čega je cijeneći volju stranaka u postupku isti i prihvatio dana 13.3.2024. godine.

2. Činjenična utvrđenja i pravna ocjena djela

Da je optuženi S.N. počinio krivično djelo bludne radnje iz člana 208. stav 2. u vezi stava 1. KZ FBiH, na način opisan izrekom ove presude, sud je utvrdio na osnovu sljedećih dokaza.

Naime, svjedok maloljetna **XY** je u iskazu datom na zapisnik Kantonalnog tužilaštva Kantona Sarajevo broj: ... od 29.9.2023. godine izjavila da je dana 17.9.2023. godine ušla u kombi Centrotrans na ..., da su se u deset do sedam otvorila vrata, a kombi kreće u sedam, da je sjela negdje pri kraju, na sjedište do prozora, gdje je taj čovjek došao i pitao je da li ovaj kombi ide za... i da li ona ide na ..., da je rekla da ide i on je sjeo pored nje i rekao joj da ona ide sa njim na i da je to završena priča, u smislu da se nema pravo buniti, da joj je to bilo malo čudno, na prvu ga nije razumjela jer je bio pijan, onda joj je on rekao da nema sreće u ljubavi, da ga žene ne vole i pitao je šta ona misli zašto njega žene ne vole i onda joj je rekao da kao to nema veze jer je ona mlada, da će ona njega da razumije, da shvati, i stavio joj je ruku na butinu i palcem ju je dirao i krenuo je da ide prema kuku rukom, da je tada jedna žena koja je bila preko puta njih to vidjela, da pored te žene niko nije sjedio i ona ju je pozvala da dođe kod nje, istakla da se ona (svjedok) u tom trenutku prepala i razmišljala je, jer je on sjedio na strani s koje se izlazi, a ona je sjedila do prozora i ona je rekla da joj je to mamina drugarica i da mora da ode kod nje i on je prvo gledao nekih 10-tak sekundi, ljutito je gledao, i ona mu je rekla da stvarno mora da ide jer će se njena mama naljutiti na nju ako ne sjedne pored njene drugarice i on je joj je rekao kao: „*Hajde ako baš moraš*“ i ustao je, ona je sjela kod te žene i kada je pogledala na sat bilo je još dvije-tri minute do kad kombi nije krenuo i kombi je već bio pun. Dalje je svjedok izjavila da je ona sjela do te žene i kada su došli na ... krenula je da ustane i on je ustao u isto vrijeme, pa je opet sjela na stolicu, čekala je dok on nije izašao i onda je izašla iz kombija, nije vidjela ni gdje je on otišao, ni ništa, zato što je trčala kući jer je bilo strah da ne krene za njom, dalje izjavila da je taj čovjek bio jako star, imao je negdje oko 70 godina, nosio je kačket, imao je plavu košulju dugih rukava i imao je veliki nos, širok nos, izjavila da ga je prije viđala na ..., kod

Vatrogasnog društva, gdje inače sjede stariji ljudi, da je taj dan nosila široke kargo pantalone i imala je majicu i on je ruku spustio na pantalone, na njenu butinu, vidjela je da je i on izašao na ..., a poslije toga se osjećala jako ružno i strah je da se opet ne desi nešto slično, odnosno ako bi je mama i tata poslali do prodavnice da ga vidi, da opet nešto tako krene uraditi, izjavila da prije nije obraćala pažnju na ljude s kačketima, starije ljude, sada kad god vidi nekog čovjeka s kačketom odmah osjeti strah, a kada je došla kući tu su bili mama i brat i oni su vidjeli na njoj da je drugačije izgledala, da se prepala, i oni su je pitali je li sve ok i ona im je rekla da je sad dobro i šta se desilo, da su javili tati, a on je nazvao policiju, izjavila da je bila na prepoznavanju dva puta, prvi put kada je bila pozvana nije niko odgovarao potpuno, a drugi put kada je došla odmah ga je prepoznala i po nosu ga je prepoznala, te izjavila da ga ponekad sanja i to je muči.

Svjedok **F.Š.** je u iskazu datom na zapisnik Kantonalnog tužilaštva Kantona Sarajevo broj: T09 0 KTD 0188465 23 od 27.11.2023. godine, izjavio da ga je dana 17.9.2023. godine oko 19:20 sati na njegov broj telefona pozvala njegova supruga L.Š. i tom prilikom rekla: „*Odmah dođi kući, imamo problem sa XY.*“, da se odmah nakon navedenog uputio svojoj kući, kojom prilikom je na ..., općina Stari Grad, zatekao svog sina K., suprugu L. i svoju maloljetnu kćerku XY, koja je bila u stanju šoka, prepadnuta i uplakana, da mu je, u prisustvu supruge, XY ispričala da se prevozila vozilom javnog gradskog saobraćaja firme „Centrotrans“, registarskih oznaka ..., na relaciji ... i da je NN starija muška osoba, koja je na glavi imala kačket, te bila u vidno alkoholiziranom stanju, prišla njegovoj maloljetnoj kćerci XY, a koja je sjedila u unutrašnjosti vozila, sjeo pored iste, te se obratio riječima: „*Ideš do ..., to je onda gotovo, šta ti misliš što ja nemam sreće sa ženama*“, nakon čega je spustio lijevu ruku na desnu nogu, tačnije butinu, zatim je istom rukom mazio po butini i nešto palcem vrtio, da je nakon navedenog njegova kćerka bila u jako uzbuđenom i stresnom stanju, što je primijetila NN ženska osoba koja se također prevozila vozilom gradskog saobraćaja, te odmah reagovala na način da je XY pozvala kod sebe da sjede, što je XY i učinila, te dolaskom do odredišta tačnije stajališta V., XY je izašla sa NN ženskom osobom, dok je starije NN muško lice koje je diralo XY, udaljilo se u nepoznatom pravcu, da im je dijete prenijelo da je bila zaleđena, da isto kao da joj je nešto stalo u grlu, nije mogla da se pomjeri, ni da ustane, ni da bilo kako odreaguje. Dalje je svjedok izjavio da mu je narednog dana njegova supruga obavijestila da je uočila lice koje je ličilo po opisu na to lice koje je opisivala njihova kćerka, jer je isti imao kačket i radilo se o starijoj osobi, a nakon čega je sve navedeno i prijavljeno policiji, da je nakon toga, naredni dan, njegova kćerka išla na zakonsko prepoznavanje u MUP KS i tom prilikom, koliko mu je poznato, nije mogla prepoznati to lice, odnosno, nije potvrdila sa sigurnošću navedenog počinioca, da je nakon toga kroz par dana, tačnije za dva dana ponovno su pozvani s obzirom da je policija došla do saznanja o počiniocu navedenog krivičnog djela nad njegovim djetetom, i on i njegova supruga su je ponovno doveli i tada je ona sa sigurnošću prepoznala tu osobu iz kombija koja je nad njom počinila navedeno krivično djelo, te istakao da je vidio da je, nakon što je izvršila prepoznavanje, dijete bilo u šoku, uplakana, tresla se, lice joj je bilo bijelo-sivo, da je od događaja povučena, šutljiva, nerado izlazi, tačnije duže od mjesec dana nije željela da sama napusti kuću, te je samo išla u školu.

Nadalje, iz izvještaja o pregledu video zapisa policijskog službenika MUP-a Kantona Sarajevo, Uprava policije, Sektor kriminalističke policije, Odjeljenje za krvne, seksualne delikte i ratne zločine, broj: 02/3-2-554/23 od 13.11.2023. godine, potkrepljen fotografijama sadržanim u fotodokumentaciji MUP-a Kantona Sarajevo, Uprava policije, Sektor kriminalističke policije, Odjeljenje za kriminalističku tehniku i forenziku, broj: 02/3-5-03-KI-830/23, datum izrade 15.11.2023. godine, proizilazi da je izvršen pregled video zapisa nadzornih kamera, koji su privremeno oduzeti od Dobrovoljnog vatrogasnog društva „Vratnik“, trgovačke radnje „Dunja“ i MUP-a Kantona Sarajevo, zabilježenih dana 17.9.2023. godine, da je izvršenim pregledom na kameri koja pokriva dio ulice Safvet bega Bašagića iz pravca Baščaršije dana 17.9.2023. godine od 18:48:07 do 18:48:24 sata zabilježen dolazak muškarca starosti iznad 60 godina, obučen u plavu košulju, svijetlo plave pantalone, dok je na nogama nosio bijele patike, a na glavi imao svijetli kačket, čiji je prednji dio tamne boje. Dalje je u izvještaju navedeno da je pregledom snimka koji pokrivaju dio ulice Safvet bega Bašagića - Sagrdžije zabilježen dolazak istog

starijeg muškarca, koji se kretao pješke u pravcu autobusnog stajališta, da je evidentiran minibus parkiran na autobuskom stajalištu sa više osoba, potom nadalje na narednim kamerama kretanje opisanog muškarca do kombija i ulazak, da je pregledom video zapisa DVD ... također evidentirano zaustavljanje opisanog minibusa, izlazak više osoba i starijeg muškarca prethodno opisanog i uočenog na ranije opisanim kamerama, da je opisano njegovo dalje kretanje u TR Dunja.

Dakle, iz navedenog izvještaja proizilazi da je u vrijeme i na mjestu koje je opisala svjedok XY nadzornim kamerama zabilježeno kretanje starije muške osobe koja je obučena u istovjetnu garderobu kako je opisala XY da je imao na sebi stariji muškarac u minibusu koju ju je dodirivao i obraćao joj se.

Da je lice koje je u svom iskazu opisala maloljetna XY optuženi S.N., proizilazi iz zapisnika o prepoznavanju lica MUP-a Kantona Sarajevo, Uprava policije, Sektor kriminalističke policije, Odjeljenje za krvne, seksualne delikte i ratne zločine, broj: 02/3-2-460/23 od 21.9.2023. godine, te foto-dokumentacije MUP-a Kantona Sarajevo, Uprava policije, Sektor kriminalističke policije, Odjeljenje za kriminalističku tehniku i forenziku, broj: O.R. 857/23, datum fotografisanja 21.9.2023. godine, u kojem je navedeno da je maloljetna XY, nakon datog opisa, od pet pokazanih joj lica prepoznala ono pod rednim brojem 2. kao lice koje je dana 17.9.2023. godine u minibusu izvršio krivično djelo bludne radnje na njenu štetu. Lice pod rednim brojem 2. je S.N..

S obzirom na gore navedeno, sud je na osnovu izloženih dokaza utvrdio da je optuženi S.N. dana 17.9.2023. godine u vremenskom periodu između 19:00 i 19:10 sati dok se prevozio kao putnik u kombi motornom vozilu javnog gradskog saobraćaja pravnog lica „Centrottrans“, registarskih oznaka ... koji je saobraćao na relaciji ... - ..., prišao maloljetnoj XY (rođena godine) tada djetetu od oko 14 (četnaest) godina, koja je sjedila na sjedištu za dvoje, sjeo pored iste, iako je bio svjestan da se radi o maloljetnoj osobi, s ciljem zadovoljavanja svog seksualnog nagona, što je i htio, te joj se obratio riječima: „*Ti ćeš sa mnom na ..., to je završena priča, nema raspravljnja*“ i „*Šta ti misliš što ja nemam sreće sa ženama*“, a zatim joj svoju ruku spustio na desno koljeno, odnosno butinu maloljetne XY, da bi je potom rukom dodirivao i milovao u predjelu butine, praveći kružne pokrete palcem svoje ruke po opisanom dijelu tijela pomjerajući ruku na više prema kuku i intimnim dijelovima maloljetne XY, odnosno, učinio bludne radnje prema maloljetniku u smislu odredbe člana 208. stav 2. u vezi stava 1. KZ FBiH.

Da je usljed radnji optuženog kod oštećene XY dovelo do akutnog PTSP simptoma koji uključuju intruzivne, nametljive misli i sjećanje na bolne događaje, noćne more, strahove, kognitivno izbjegavanje negativnih misli i sjećanja, sud je utvrdio na osnovu timskog psihijatrijsko psihološkog nalaza i mišljenja vještaka **Čemalović Omera** i **Dervović Elvedine** od 13.10.2023. godine, iz kojeg proizilazi da je obavljen psihijatrijski pregled svjedoka/oštećene maloljetne XY, da je primijenjena skala za procjenu ponašanja mladih rezultirala profilom na kojem se evidentira kliničko značajno prisustvo internaliziranih (emocionalnih) problema, te prisustvo ukupnih problema, da dobiveni profil karakteriše značajno povišenje sindromske skale povlačenje/depresivnost, te povišenje skala anksioznost/depresivnost, somatske žalbe, problemi mišljenja (intruzije, poremećaj sna itd.) na granici kliničke značajnosti, da primijenjena ljestvica simptoma traume kod djece ukazuje na validan protokol, da profil kliničkih ljestvica karakteriše značajno povišenje ljestvica anksioznost i PTSP, da dobiveni rezultati ukazuju na visok opseg samodoživljavanja generalizirane anksioznosti, preveliku pobuđenost i brigu, specifične strahove od muškaraca i mraka itd. (podljestvica anksioznost zahvaća i epizode opće anksioznosti i strahove od neposredne opasnosti), PTSP simptome koji uključuju intruzivne, nametljive misli i sjećanja na bolne događaje, noćne more, strahove, kognitivno izbjegavanje negativnih misli i sjećanja. Dalje je navedeno da podaci koji se dobiju od ispitanice ukazuju na izloženost stresnom i traumatskom događaju neadekvatnog i seksualno obojenog ponašanja, odnosno zlostavljanja od strane nepoznatog čovjeka u kombiju, da u toku pregleda maloljetna XY ispoljava sve kardinalne simptome i znake akutnog stresom uzrokovanog poremećaja PTSP, a što je posljedica izlaganja visoko stresogenom traumatskom događaju, neadekvatnih

verbalizacija i ponašanja koje je imalo karakter seksualnog zlostavljanja, te da stanje zahtjeva uključivanje profesionalca u njeno liječenje i rehabilitaciju.

Da je optuženi S.N. gore navedene radnje počinio na način da je bio svjestan svoga djela i da je htio njegovo izvršenje, odnosno, da je postupao sa direktnim umišljajem, sud je utvrdio na osnovu okolnosti konkretnog slučaja i radnji za koje je na osnovu gore navedenih i obrazloženih dokaza utvrđeno da je isti poduzimao, odnosno, da je kritične prilike prišao maloljetnoj XY, da se istoj obratio riječima: „*Ti ćeš sa mnom na ..., to je završena priča, nema raspravljanja*“ i „*Šta ti misliš što ja nemam sreće sa ženama*“, da je svoju ruku spustio na desno koljeno, odnosno butinu maloljetne XY, da je potom rukom dodirivao i milovao u predjelu butine, praveći kružne pokrete palcem svoje ruke po opisanom dijelu tijela pomjerajući ruku na više prema kuku i intimnim dijelovima maloljetne XY, koje radnje poduzimane u kontinuitetu i u okolnostima konkretnog događaja nesumnjivo ukazuju na svijest i volju optuženog da izvrši bludnu radnju prema maloljetnom licu, odnosno, na navedeni oblik vinosti, sve u vezi sa potpunim priznanjem krivnje sadržanom u predmetnom sporazumu o priznanju krivnje.

3. Vrsta i visina krivičnopravne sankcije

Prihvatajući sporazum o priznanju krivnje, sud je prihvatio i predloženu krivičnopravnu sankciju u skladu sa članom 246. stav 7. ZKP FBiH, te je optuženom za krivično djelo bludne radnje iz člana 208. stav 2. u vezi stava 1. KZ FBiH izrekao kaznu zatvora u trajanju od 1 (jedne) godine, nalazeći na strani optuženog otežavajuće okolnosti da je krivično djelo prema maloljetnom djetetu počinio na javnom prostoru, odnosno, u sredstvu javnog prevoza, što upućuje na spremnost i upornost za zadovoljenje seksualnog nagona i učinjenju krivičnog djela, bez obzira na činjenicu što su se u autobusu nalazili i drugi putnici, te da je oštećena maloljetna XY usljed radnji optuženog doživjela značajne psihološke posljedice, usljed kojih je i dato mišljenje da nije sposobna da da iskaz pred osumnjičenim, što proizilazi iz timskog psihijatrijsko psihološkog nalaza i mišljenja vještaka Ćemalović Omera i Dervović Elvedine od 13.10.2023. godine. Kao olakšavajuće okolnosti na strani optuženog sud je cijenio da se radi o osobi starije životne dobi sa napunjene 73 godine, te priznanje krivnje izvršenja krivičnog djela u ranoj fazi postupka, čime je doprinio ekonomičnosti i efikasnosti istog.

Sud ističe da kao otežavajuću okolnosti nije cijenio osuđivanost optuženog za krivično djelo krađa presudom Apelacionog suda u ... od 1980. godine, s obzirom da se radi o osudi staroj više od 40 godina.

Sud je na osnovu člana 57. stav 1. KZ FBiH optuženom S.N. u izrečenu kaznu zatvora uračunao vrijeme koje je proveo u pritvoru, i to od 20.9.2023. do pa do upućivanja na izdržavanje kazne zatvora.

4. Odluka o imovinskopravnom zahtjevu i troškovima krivičnog postupka

Zakonska zastupnica oštećene XY, L.Š. je na ročištu za razmatranje sporazuma o priznanju krivnje održanom dana 13.3.2024. godine izjavila da postavlja imovinskopравни zahtjev za naknadu štete, ali se nije opredijelila u pogledu visine istog u skladu sa članom 209. stav 3. ZKP FBiH, te je sud primjenom odredbe člana 212. stav 2. ZKP FBiH imenovanu sa navedenim imovinskopравnim zahtjevom uputio da može ostvarivati u parničnom postupku.

Na osnovu člana 202. stav 4. ZKP FBiH optuženi S.N. je djelimično oslobođen od obaveze plaćanja troškova krivičnog postupka, i to u odnosu na troškove odbrane, koji padaju na teret budžetskih sredstava, koju odluku je sud donio cijeneći da je optuženom postavljen branilac po službenoj dužnosti zbog obavezne odbrane, a da je visina penzije od koje se optuženi izdržava u nepoznatom iznosu, dok je na osnovu člana 202. stav 1. ZKP FBiH obavezan na plaćanje troškova krivičnog postupka u ukupnom iznosu od 840 KM, koji iznos je dužan uplatiti u roku od 3 (tri) mjeseca od pravosnažnosti presude, pod prijetnjom prinudnog izvršenja, koji se sastoje

od troškova Kantonalnog tužilaštva Kantona Sarajevo u iznosu od 300 KM na ime provedenog psihološkog vještačenja, po rješenju broj T09 0 KTD 0188465 23 od 27.11.2023. godine, i u iznosu od 300 KM na ime provedenog neuropsihijatrijskog vještačenja po rješenju broj T09 0 KTD 0188465 23 od 1.12.2023. godine, te troškova Općinskog suda u Sarajevu u paušalnom iznosu od 240 KM za tri zakazana ročišta za glavni pretres, odnosno, razmatranje sporazuma o priznanju krivnje, koju odluku je sud donio cijeneći da optuženi ostvaruje prihode penzije bez obzira što se nalazi u pritvoru, te da navedeni iznos, sa rokom plaćanja od tri mjeseca od pravosnažnosti presude, nije u visini čijim bi plaćanjem bilo dovedeno u pitanje izdržavanje optuženog.

S obzirom na gore navedeno, sud je donio odluku kao u izreci ove presude.

ZAPISNIČAR
Hasković Maida

SUDIJA
Begtašević Tin

POUKA O PRAVNOM LIJEKU: Protiv ove presude dozvoljena je žalba Kantonalnom sudu u Sarajevu, izuzev u odnosu na izrečenu krivičnopravnu sankciju, koja se podnosi putem ovog suda u roku od 15 (petnaest) dana od prijema pismenog otpravka presude, u dovoljnom broju primjeraka za sud i stranke. Oštećeni može pobijati presudu samo zbog odluke suda o troškovima krivičnog postupka i odluke o imovinskopravnom zahtjevu (član 308. stav 4. ZKP FBiH).